

Rhaglen Staff Nyrsio Cymru Gyfan

Diweddariad ar Ffrwd Waith Ymwelwyr
Iechyd - Ionawr 2022




Cyflwyniad

Mae'r grŵp ffrwd waith ymwelwyr iechyd yn cynnwys uwch gynrychiolwyr o bob bwrdd iechyd ledled Cymru. Arweinydd y ffrwd waith a chadeirydd y grŵp yw Chris Overs (Nyrs Adrannol ym Mwrdd Iechyd Prifysgol Aneurin Bevan), Rhiannon Beaumont Wood yw'r Noddwr Gweithredol (Cyfarwyddwr Gweithredol Nyrsio ac Ansawdd yn Iechyd Cyhoeddus Cymru) a Rebecca Boore (Addysg a Gwella Iechyd Cymru) yw arweinydd y prosiect ffrwd waith. Mae'r ffrwd waith yn cwrdd yn rheolaidd i adolygu, datblygu a chryfhau dulliau sy'n ymwneud ag ansawdd a'r gweithlu, dulliau ac offer sy'n seiliedig ar egwyddorion Gofal Iechyd Darbodus sy'n canolbwyntio ar ansawdd, cydraddoldeb mynediad a lleihau amrywiaeth ledled Cymru. Bydd y ffrwd waith yn cefnogi byrddau iechyd gan ddilyn dull 'Unwaith i Gymru', i ddiwallu gofynion Deddf Lefelau Staff Nyrsio (Cymru) 2016 (Deddf 2016) wrth baratoi ar gyfer ymestyn ail ddyletswydd y Ddeddf 2016 i ymwelwyr iechyd.

Nod y ffrwd waith ymwelwyr iechyd yw dilyn dull sy'n seiliedig ar dystiolaeth i greu dulliau, offer a thechnegau cadarn i bennu lefelau staffio priodol o fewn gwasanaethau ymwelwyr iechyd ledled Cymru, gan ddefnyddio'r model triongli fel y nodir yn y Ddeddf. Mae'r dull triongli yn ymgorffori barn broffesiynol, dangosyddion ansawdd ac aciwtedd a dibyniaeth plant a theuluoedd. Bydd yr offer a ddyfeisiwyd gan y ffrwd waith yn galluogi timau ymwelwyr iechyd i gyfrifo nifer cywir yr ymwelwyr iechyd a'r cymysgedd sgiliau sydd eu

hangen i gyflwyno Rhaglen Plant Iach Cymru a darparu gofal effeithiol i ddiwallu anghenion plant, teuluoedd a chymunedau yn seiliedig ar yr egwyddor o gyffredinolïaeth gymesur.

Mae Llywodraeth Cymru wedi amlinellu ei gweledigaeth hirdymor ar gyfer y dyfodol yn 'Cymru Iachach' (Llywodraeth Cymru 2019) ac yn nodi'r newidiadau sydd eu hangen yn ein system iechyd a gofal cymdeithasol, fel ei bod yn gallu diwallu anghenion cenedlaethau heddiw a'r dyfodol yng Nghymru. Cydnabyddir yn gyffredinol mai'r blynyddoedd cynnar yw'r amser mwyaf hanfodol o ran llunio cyfleoedd bywyd. Mae timau ymwelwyr iechyd yn rhan o'r system blynyddoedd cynnar integredig ehangach, sy'n darparu



gwasanaethau i blant a theuluoedd drwy gyflwyno Rhaglen Plant Iach Cymru a darparu ystod o wasanaethau i ddiwallu anghenion plant a theuluoedd a mynd i'r afael ag anghydraddoldebau iechyd.

Mae angen i weithlu ymwelwyr iechyd y dyfodol gyd-fynd ag egwyddorion a mesurau llwyddiant a amlinellir yn 'Cymru Iachach: Ein Strategaeth Gweithlu ar gyfer Iechyd a Gofal Cymdeithasol' (Addysg a Gwellfa Iechyd Cymru (AaGIC) 2020). Mae hyn yn cynnwys bod â gweithlu sy'n gynhwysol, wedi ymgysylltu, yn gynaliadwy ac yn hyblyg gyda gwell recriwtio a chadw staff drwy drefniadau gweithio deniadol a hyblyg, addysg a chyfleoedd gyrfa. Mae'r strategaeth hefyd yn tynnu sylw at y defnydd o gynllunio gweithlu yn seiliedig ar ddealltwriaeth, gan alluogi'r gallu i newid y gweithlu er mwyn diwallu anghenion y boblogaeth. Gellir hwyluso cydberthynas agosach rhwng anghenion iechyd y gweithlu a'r boblogaeth drwy gysylltiadau agosach rhwng timau ymwelwyr iechyd a chydweithwyr gofal sylfaenol. Mae'r grŵp ffrwd waith yn credu y dylai'r gwasanaeth ymwelwyr iechyd gael llais cryfach o fewn y clystyrau gofal sylfaenol, gan nodi a chefnogi anghenion iechyd y boblogaeth leol a gweithio mewn gwir gydweithrediad ar draws ffiniau proffesiynol.

Yn ddiweddar, mae Llywodraeth Cymru wedi cyhoeddi 'Cymru Fwy Cyfartal (Llywodraeth Cymru 2021) yn amlinellu dyletswyddau economaidd-gymdeithasol y sector cyhoeddus wrth wneud penderfyniadau strategol megis 'penderfynu blaenoriaethau a gosod amcanion', i ystyried sut y gallai eu penderfyniadau helpu i leihau'r anghydraddoldebau sy'n gysylltiedig ag anfantais economaidd-gymdeithasol.

Bydd y grŵp ffrwd waith yn gweithio mewn ffordd gyfannol, gan fabwysiadu'r egwyddorion a nodir yn y ddyletswydd hon a chysoni ei waith â pholisi Llywodraeth Cymru a strategaeth gweithlu AaGIC.

Cynnydd hyd yma

Uchafbwyntiau'r cynnydd hyd yma yn erbyn y ffrwd waith:

- Datblygu ail ddrafft yr egwyddorion staffio ymwelwyr iechyd i lywio ac arwain cynlluniau'r gweithlu fel mesur dros dro hyd nes y gellid ymestyn Deddf 2016 i ymwelwyr iechyd
- Mapio'r gweithlu ymwelwyr iechyd ledled Cymru
- Gweithio mewn cydweithrediad ag ymwelwyr iechyd o bob rhan o Gymru a phob bwrdd iechyd i ddatblygu Lefelau Gofal Cymru ar gyfer ymwelwyr iechyd
- Archwilio a nodi dangosyddion ansawdd sy'n berthnasol i ymwelwyr iechyd
- Ymgysylltu â rhanddeiliaid a rhannu'r cynnydd ar y gwaith
- Cwmpasu systemau TG a ddefnyddir ar draws gwasanaethau ymwelwyr iechyd i gasglu ac adrodd data
- Cwblhau prawf peilot o'r llyfr gwaith barn broffesiynol ar gyfer ymwelwyr iechyd
- Darparu adroddiadau rheolaidd a phapurau sefyllfa ar gynnydd y ffrwd waith yn erbyn cynllun y ffrwd waith i Grŵp Staff Nyrsio Cymru Gyfan a'r Cyfarwyddwyr Nyrsio/Prif Swyddog Nyrsio

Camau nesaf

Dros y 6 mis nesaf, bydd gwaith yn parhau fel y nodir yng nghynllun llif gwaith ymwelwyr iechyd gan gynnwys:

- Cefnogi byrddau iechyd i gwblhau asesiadau effaith ar egwyddorion staff nyrsio interim ar gyfer ymwelwyr iechyd
- Treialu drafft cyntaf offeryn Lefelau Gofal Cymru ledled Cymru, yna coladu a dadansoddi'r data
- Nodi mesurau a chyfleoedd penodol ar gyfer cipio data o'r dangosyddion ansawdd
- Mireinio'r llyfr gwaith barn broffesiynol yn seiliedig ar ganlyniadau'r prawf peilot
- Archwilio cyfleoedd ar gyfer cipio data a nodi setiau data hanfodol a dymunol

Hoffai Arweinydd y Ffrwd Waith Chris Overs ddiolch i holl aelodau'r grŵp am eu cefnogaeth a'u hymrwymiad parhaus er mwyn symud ymlaen â'r gwaith pwysig hwn. Hoffai Chris ddiolch hefyd i ymwelwyr iechyd ledled Cymru am eu hymgysylltiad proffesiynol rhagorol a'u cyfranogiad mewn gweithgareddau ffrydiau gwaith, yn ystod y cyfnod hyn sydd wedi bod yn 18 mis heriol iawn oherwydd pwysau Covid-19.

I gael mynediad at gylchlythyrau blaenorol a dysgu mwy am Raglen Staff Nyrsio Cymru Gyfan a'r gwaith a wneir gan y ffrwd waith, ewch i wefan.

Os hoffech fwy o wybodaeth am y ffrwd waith ymwelwyr iechyd, anfonwch e-bost at Rebecca.boore2@wales.nhs.uk

Noddwr Nyrs Gweithredol:
Rhianon Beaumont-Wood (Iechyd Cyhoeddus Cymru)

Arweinydd y Ffrwd Waith
Chris Overs (Bwrdd Iechyd Aneurin Bevan)

Arweinydd y Prosiect:
Rebecca Boore
Am ragor o wybodaeth cysylltwch â Rebecca.boore2@wales.nhs.uk

Cyfeiriadau

Gwella Addysg Iechyd Cymru (2020) Cymru Iachach. Ein Strategaeth Gweithlu ar gyfer Iechyd a Gofal Cymdeithasol Ar gael yn: <https://heiw.nhs.wales/files/health-and-social-care-workforce-strategy/workforce-strategy-for-health-and-social-care/> Cyrchwyd ar 28/09/21

Llywodraeth Cymru 2020. Trosolwg o Raglen Plant Iach Cymru. Ar gael yn: Microsoft Word - Dogfen Plant Iach Cymru Llyw Cymru - fersiwn cyhoeddedig[1].docx Cyrchwyd ar: 23/04/21

Llywodraeth Cymru 2019. Cymru Iachach. Ar gael yn: Cymru Iachach (llyw.cymru) Cyrchwyd ar: 23/04/21

Llywodraeth Cymru 2021. Cymru Fwy Cyfartal Y ddyletswydd economaidd-gymdeithasol. Ar gael yn: WG42004 Cymru Fwy Cyfartal Deddf Cydraddoldeb Dyletswydd Economaidd-Gymdeithasol 2010 (llyw.cymru) Cyrchwyd ar: 23/04/21